

Paulo Ena Marere

ROMA

Haukia Herekiae

Puka Aona Irerena 'Abina

Paulo ehore puka neiana ererena pokina ena nuatae hanona keao a'ikakauma haukia to'ukia baika Roma aiara apa'uana haukia keihanakia. Ena nuatae hanona keao kipokia katemiahio 'apua ba keao Speini (15.23, 24). Puka neiana aonai Paulo ehore Keriso pouna namona ehina pou haraina, mai weiakia Iesu murinai ti'au haukia ekia mauri aea katehoma.

Kori'uainai hanona banamo 'abina a'ikakauma haukia to'ukia Romai temiaho herekiae ehinana. Epua puka 'abina anina tohana na ehina harai aihona, "pou namona aonai bero Tirama herenai emai hauna ewaira tina, kaha'i ramana a'ikakaumai keaomo puana." (1.17) Haeamona Paulo e'abi, maearima weiakia Iuda haukia 'ao rama haeai haukia ikoikiae hanona ki'a haukia. Weiana Tirama ehore ia eaoko'oai ki'anakia, eapari muenakia Iesu Keriso katea'ikakaumana haukia hanona Tirama kehore ia kebamaurinakia.

Puka iro'ana 5–8 aonai Paulo ehore Tirama ena rauhubu anina mai Auba Robe a'ikakauma haukia ekia mauri aonai hauna robakia eahunakia. Iro'ana 9–11 hanona Paulo kipona ena puma apa'uana ha robana eahuna, weiana Iuda haukia weiakia Tirama etina'anakia ia ena maearimai kateao haukia bo'ona Iesu tekamuri aina. Haeamona rama haeai haukia hanona temai Iesu i'abana haukiae teao, iamo Iuda haukia hanona aha'i. 'A Paulo ena a'ikakauma hanona muriae Iuda haukia katemai Iesu ena maearimai kateao. Puka neiana a'enai hanona Paulo ehore hoahoai mai babai weiana a'ikakauma haukia kateka'ai haukia robakia eahuna.

Puka Paipana Apa'uakia

- a. Roba ahu mai 'abi'abi apa'uana. (1.1-17)
- b. Maearima bamauri katea'ina hanona taba apa'uana. (1.18–3.20)
- c. Tirama ena bamauri taearana. (3.21–4.25)
- d. Mauri mahamahana Keriso aonai. (5.1–8.39)
- e. Isaraela haukia Tirama ena raona aonai. (9.1–11.36)
- f. A'ikakauma maurina. (12.1–15.13)
- g. 'Abi orekia mai banamo 'abikia. (15.14–16.27)

Paulo Ena Iuhubeau Akana Pouna Ehinana.

1 ¹Au Paulo e'u marere neiana. Iesu Keriso ena ta'ara ia'ina hau'u, ena iuhubeau haunai kaeao paunai Tirama etina'ana'u eaparina'u ena pou namona kairoro aina.

²Pou namona neiana hanona Tirama ehore aba wa'i baha e'abi'uai aina ena mahabanai haukia pinakiai tehinana Puka Robena aonai tererena, ³ia Nahuna pouna, eka Obiapaka weiana Iesu Keriso, hauanai hanona Davida nininai erama, ⁴ia aubana robenai hanona 'ariai ebamikirina raninai ebatohana mai hiabuna ia hanona Tirama Nahuna. ⁵Iesu Keriso paunai mai ia atanai baraibarai apa'uana abomo iuhubeau hoana aba ta'ina, weiana rama haeai haukia baiatakiai maearima ikoikiai kataparinakia a'ikakaumai aia kateka'ai. ⁶Wai abomimo weia Iesu Keriso 'eunai Tirama ehore eaparinakia haukia baiatakiai.

⁷Roma ai tomiaho Tirama eraona'au ainimi eaparinimi ena maearimai ebaonimi haumi ikoimiai, Hamaka Tirama mai Obiapaka Iesu Keriso herekiai aoko'o hoana abomo baibua katoa'ina.

Paulo Enuatae Keao Roma.

⁸E'u 'abi kori 'uaina neiana: Iesu Keriso atanai e'u Tirama nabanamona wai ikoimiai paumiai, pokina wai emi a'ikakauma pouna hanopaka ikoinai aba teona. ⁹Tirama weiana Nahuna pouna namona nairoro aina aonai ta'arana na'i mai ao'u ikoinai hauna e'ioquina e'u bahuba'ari ai au wai naraonanimi, ¹⁰rani ikoinai e'u bahuba'ari ai Tirama nanoina ena nuataeai taeara'u pekaikauna rani ha pawahi paihanimi. ¹¹Pokina au nuataeai ki'a baha kaihanimi, auba ena beruberu kabaibenit katabura. ¹²Weiana hanona au mai wai kipoka kahabrainaka, eka a'ikakaumai ha ha kahataburanaka.

¹³Uaho'aba'u e, au nuatae wai kato'ioquina, rani bo'ona anuatae kawahi heremi, buabua katabu ahi ihobona rama haeai haukia baika ekia mauri tebaibenit aihanakia 'abana, ia taba baika tehore tekaiabuna'u emaimo bariu. ¹⁴Au hanona pou namona ihananai 'ara kahore maearima ikoikiai herekiai, Helene haukia mai ea aha'i haukia abomo ao 'abaea haukia mai aotipa haukia herekiai. ¹⁵Weiana buonai au nuatae ki'a baha wai Roma ai tomiaho haumi wairamiai abomo pou namona kairoro aina.

¹⁶Au pou namona a'i naahumaea aina, pokina ia hanona Tirama ena hiabu, a'ikakauma haukia ikoikiai kebamaurinakia kori'uaina hanona Iuda haukia, muriai hanona rama haeai haukia. ¹⁷Pokina pou namona aonai bero Tirama herenai emai hauna ewaira tina, kaha'i ramana a'ikakaumai keaomo puana, puka robenai tererena 'abana, "Aka bero hauna hanona a'ikakaumai kemauri."

Tirama Ena Opuere Maearima Herekiai.

¹⁸Maearima ekia kamuri mai babai ki'a paukiai Tirama ena opuere kupai emai ewaira tina, weiakia ekia babai ki'ai 'abi tohana tihaō parena haukia herekiai. ¹⁹Tirama i'lobina hanona aba emahanai harai herekiai, pokina Tirama ehore ebaihanakia. ²⁰Hanopaka erama popounai emaimo bariu Tirama 'eunai a'i nahaihanakia tabakia ena hiabu banai banai mai ena auba maurina hanona ia ebabai tabakia aokiai tewaira tina harai teihanakia te'lobinakia, weiana paunai maearima kebuniai hanona taearana aha'i.

²¹Tirama te'lobina iamo a'i tea'i taeana abomo a'i tebanamona ia hanona Tirama, ia ekia ao 'abaea mai ekia ao po'oai wapura ehore aokia ekaibuna. ²²Ia kipokia teraonana teao tipa, iamo po'o haukiai teao. ²³Miaho banai banai Tiramana ikuti aina tehabona, ia maearima aubaubakia a'i katemiaho banai banai haukia, roborobo, mahi, mai tikara tabakia haukia, aubaubakia imakiai tebabai tabakia tekuti ainakia.

Maearima Aka Ki'a Obokia Haeai Haeai Tibabai.

²⁴Weiana buonai Tirama ehore aokiai ki'a tenuatae ainakia 'ekanai ehabonakia, weiana kipokia ekia babai ki'a obokia parikia akakia katebabai ha ha herekia. ²⁵Tirama ena 'abi tohana hanona ia tehore bai'oi tabanai tebaona, iamo 'ekanai hanona taba ebarama tabakia tekuti ainakia ta'arakia tea'i. Iamo ebabainakia hauna Ia ikupaiana kababanamona keaomo banai banai. Amen.

²⁶Tirama ehore ehabonakia teao ekia babai ki'a obokia aonai. Ekia babi'e tehore babi'e tenabau ainakia weiana ua a'i pehoma hauna tebabaina. ²⁷Taearea ihobonai hau abomo babi'e kipokia hawainibena tehabona, ia hau tehore hau tenuatae ai ki'anakia. Hau kipokia 'abakia herekiai babai ki'a obokia tebabai. Weiana hanona ekia babai ki'a 'arana kipokia pumana tehoa aina.

²⁸Ia tehore aokiai Tirama iraona 'ininai a'i tenuatae aina, weiana Tirama ehore ekia ao 'abaea ehabonakia, a'i patebabai akakia tebabai.

²⁹Aka ki'a obokia haeai haeai aokia tebonu, babai ki'a obokia, uhore mai raona ki'a obokia, wamuru, ahuahu, 'au, bai'oi mai ao bahaiara akakiai tebonu. Teuahuahi, ³⁰mai 'abi'abiai ha ha atakia tia'i ki'anakia, Tirama ti'oatana, tiaiahu 'abaea, tiapa, abomo tibaro'e, raona ki'a obokia 'eka baikai tiraonanakia katebabai. Hamakia mai hinakia aiakia a'i tio'o.

³¹Ia hanona ekia raonaraona aha'i, ekia 'abi'uai a'i tibatohanakia, mai maearima herekiai namo 'ao aoko'o a'i tiba ihanakia. ³²Tirama ena rauhubu aba te'lobina maearima 'eka ua homanai temiaho haukia hanona kate'ari. Ia ki'a weiakia tibabai to'o baihanakia abomo maearima baika tibabai raninai tiaonamo ainakia.

Tirama Ena Bakai Berona.

2 ¹Weiana buonai 'abiai hau ha behoai nuhorotina haumu, emu bero 'abina ha aha'i. Oi 'abiai hau ha behoai nuhorotina hanona kipomu puma nubeni'o. Pokina ia behoai ohorotina akana ihobonai oi abomo nubabaina. ²Aika ha'lobina Tirama hanona mai ena bero ua tibabai aiho haukia behoai kehorotinakia. ³Weiana oi 'abiai hau ha behoai nuhorotina ia akana ihobona nubabaina haumu, oi nuraonana Tirama behoai kehorotini'o 'ekanai aba kokapare, u? ⁴Ao aehoma a'l o'lobina Tirama ena namo apa'uana weiana ehole e'uai aini'o raona kabe taearanai ena namo apa'uana, ena baiha hao mai ena bakiro oiha ta'erainakia? ⁵Ia aomu etubu, emu raona kabe aha'i paunai oi kipomu emu puma nubararona, Tirama ena opuere mai ena bero bakai berauranakekara'au raninai emu puma weia kewaira tina. ⁶Tirama kehore maearima ha ha ekia babai ihobohobokiai arakia kebenakia. ⁷Maearima baika aka namokiae tibapahihi haukia abomo nuabi mai mariki abomo a'i kepua maurina titabuna haukia hanona Tirama kehore mauri banaibana kebenakia. ⁸Ia maearima baika tiani ki'a mai 'abi tohana tibaoao aina, aka behokia tia'l taeanakia haukia hanona Tirama ena opuere mai ena puma ahakiae kebaririna. ⁹Aka ki'a obona tibabaina haukia ikoikiae hanona atetua mai haiara katehoaina Iuda haukia mo aha'i rama haeai haukia abokia mo. ¹⁰Ia aka namona tibabaina haukia ikoikiae hanona Tirama kehore nuabi, mariki mai baibua kebenakia, kori'uaina hanona Iuda haukia, muriai hanona rama haeai haukia. ¹¹Pokina Tirama hanona maearima ha a'l nitaina.

¹²Mose ena rauhubu kapenai temiaho haukia tiaka ki'a hanona weianai aka ki'a haiarana katea'ina, 'a rauhubu aonai temiaho haukia tiaka ki'a hanona rauhubu kebabainakia. ¹³Rauhubu uruna tio 'abaeana haukia hanona Tirama wairanai bero a'l katea'ina, ia rauhubu akana tibabaina haukia hanona berokia kehinana. ¹⁴Rama haeai haukia herekiae Mose ena rauhubu aha'i, ia aokiae rauhubu hoana ihobona tebabaina raninai, rauhubu herekiae aha'i re'a, ia kipokia rauhubuai teao. ¹⁵Ia aokiae rauhubu 'abina tererena hauna ekia hoahoa niwaira tina aokiae abomo weiana nibatohana, ekia raonaraona weiana nihore behokia nehinana 'ao berokia nehinana. ¹⁶Pou namona airoro aina ihobonai, berauranakekara'au raninai Tirama kehore maearima ekia raona bunikia kebakainakia Iesu Keriso paunai.

Iuda Haukia Teraonana Rauhubu Kebarainakia.

¹⁷Ia wai kipomi tu'abi Iuda haumi, rauhubuai tukori 'ini abomo Tirama tuapaina, ¹⁸abomo Tirama taba nenuatae aina hauna to'lobina mai bero nimai 'ekana to'lobina pokina wai rauhubu tomare aina. ¹⁹Turaonana wai hanona maha'iau haukia ibaka'a haraikia mai wapurai temiaho haukia ekia ea ²⁰abomo po'o haukia irobekia mai a'l temarere haukia iba'lobikia haumi, pokina rauhubu aonai aotipa mai 'abi tohana

maikoinai totabu ahinakia. ²¹'Abami tuba'ibinakia ia aehoma wai kipomi a'i tubatohana? Toiroro a'i katebainao, ia wai tubaina? ²²Tu'abi a'i katenabau, ia wai tunabau? Kaiba'uku 'arikia a'i tu'ari, ia wai ro'e^a aona tabakia tubaina? ²³Wai rauhubu nemiaho paunai tuapa, ia rauhubu tukabena hanona Tirama atana tua'i ki'ana. ²⁴Puka robena aonai e'abi, "Wai Iuda haumi paumiai rama haeai haukia Tirama atana tia'i ki'ana."

²⁵Rauhubu koka'ai haraina raninai emu itare hanona namo kebeni'o, ia rauhubu kokabena raninai oi hanona ihobona itare a'i oa'ina 'abana. ²⁶Rama haeai hauna ha a'i tetarena ia Tirama ena rauhubu 'abina keka'ai haraina raninai Tirama kehore itare ea'ina haunai kebaona. ²⁷Weiana hauaniai a'i etarena ia rauhubu eka'ai haraina hauna kehore oi Iuda haumu behoai kehorotini'o, pokina rauhubu tererena hauna heremuai abomo itare oa'ina ia rauhubu nukabena. ²⁸Maearima hauaniai ihaihana Iuda hauna ia Iuda hauna tohana aha'i abomo hauaniai itare tea'ina hanona itare tohana aha'i. ²⁹A aona nibamaha mahana hauna ia hanona Iuda hauna tohana, abomo itare hanona aoai kebabaina Auba Robeai, ia rauhubuai aha'i. Maearima uahomana hanona banamo Tirama herenai kea'ina, ia maearima herekiae aha'i.

Tirama Ikupaiana Keibatoha.

3 ¹Uahomana raninai Iuda haukia ekia namo hanona taba? Itare ena namo hanona taba? ²Taeara bo'okiai. Kori 'uaina hanona Tirama ena 'abi Iuda haukia herekiae ehorotina kate'imana. ³Weiana baika ekia a'ikakauma peaha'i raninai aehoma? Ekia a'ikakauma aha'i buonai Tirama kipona ena 'abi'uai a'i kebatohana, u? ⁴Ua a'i kehoma. Maearima ikoikiae katebai'oi, ia Tirama ikupaiana keibatoha. Puka robenai tererena ihobona,

"Emu 'abiae kobatohani'o obero.

Weiana kateba bakaini'o raninai
kotara haonakia."

Sal 51.4

⁵'A aika eka ki'a kehore Tirama ena babai berona kebawaira tinana raninai, taba na kahahoma? Weiana Tirama puma 'ekanai nihorotinaka hanona nibeho, u? Aha'i. Ua a'i kehoma. (Neiana hanona maearima ekia raonaraona nahinana.) ⁶Ua homana aha'i. Tirama a'i kebero raninai, hanopaka aea kebabakai aihona? ⁷Baika te'abi, "Au e'u bai'oi pehore Tirama ena 'abi tohana pebawaira tinana abomo ena nuabi pebapa'uana raninai, taba buonai au aka ki'a pumana kahoaina ki'a hauna 'abana?" ⁸Baika ai tekai ahi 'abaeanamai te'abi ai hanona na ta'abi aihoe, "Namo ibaramana

^a 2.22 marea robe

paunai ki'a akakia kahababai." Ekia bai'oi pumana katehoaina hanona kenamo.

Hau Ha A'i Ebero Ki'a Bahá.

⁹Uahomana raninai taba na kahahoma? Aika Iuda hauka hanona hanamo ba rama haean haukia? Aha'i 'akina. Pokina Iuda mai rama haean haukia hanona ki'a aonai nahamiaho 'abina aba hahinana. ¹⁰Puka Robenai tererena ihobonai,

"Maearima ha a'i ebero
ki'a baha Tirama wairanai,
tai ha aha'i 'akina.

¹¹Abomo ao bero hauna ha aha'i,
Tirama itabuna hauna ha aha'i.

¹²Ikoikiai aba tekaobo aba ki'a
aonai tetoto haeanaka aka namo
hauna ha aha'i, tai ha aha'i.

Sal 14.1-3

¹³Ekia 'abi timikia hanona
teki'a matoha 'ariahana
ikaikau, maeakia bai'oi 'abikia
tehinanakia.
Pinakia 'abinai hanona 'abakia
tibahaiarakia matoha 'erau ekia
ba'ari muramurana 'abana.

Sal 5.9

¹⁴Pinakia hanona ururu mai aomabi
'abikia tebonu.

Sal 10.7

¹⁵Ia tinoanoa maearima kateba
haiaranakia mai kateahu 'arinakia.

¹⁶'Eka tabana kateao hanona
maearima kateba 'oatanakia
mai kateba atetuanakia.

¹⁷Abomo baibua taearana hanona
a'i te'iorina.

Isa 59.7, 8

¹⁸Tirama a'i titauai 'apuana."

Sal 36.1

¹⁹Aika ha'iorina rauhubu taba ne'uahina hanona weiakia rauhubu
ba'anai temiaho haukia nehina benakia, weianai maearima ekia ba'ame
'abikia aha'i, hanopaka maikoinai Tirama ena bakai aonai katetoto.

²⁰Tirama wairanai hau ha a'i ebero rauhubu ika'ai haraina paunai, ba
rauhubu hanona keba 'iobinaka aika ki'a hauka.

Maearima Kea'ikakauma Hauna Berona Katehinana.

²¹Bariu Tirama maearima bero kebenakia taearana aba ebawaira
tinana, rauhubuai aha'i, weiana hanona rauhubu mai mahabanai

haukia tebatohana. ²²Bero Tirama herenai nimai hanona Iesu Kerisotia'ikakaumana haukia ikoikiai katetabu ahina maearima ikoinai herekiai ha a'i ehaeai. ²³Pokina ikoikiai aba teaka ki'a, buonai Tirama ena nuabiai tetara kapu. ²⁴Iamo Tirama ena aoko'o hoana ebaiben'i abaea, ikoinai bero teal'ina Keriso Iesu paunai, pokina ia ehore ekawa muenakia. ²⁵Tirama ehore Iesu eupuna emai hanopakai e'ari baibua hoanai eao, Iesu e'ari eka ki'a paunai hauna kaha'ikakaumana hauka eka ki'a kehina hao. Neiana ebabaina hanona ena bero ebaiha baiha aina. Aona ea'i 'inina, 'uainai maearima teaka ki'a haukia eiha haonakia puma a'i ebenakia. ²⁶Bariu rani neianai Tirama hoa weiana ebabaina kipona ena bero ebaiha baiha aina, taeara weianai Iesu tia'ikakaumana haukia abomo bero kebenakia.

²⁷Uahomana raninai taba hauna kahapaina? Ba taeara tabanai? Rauhubu ika'ainai? Aha'i. Taba ha ai aha'i. Ia a'ikakauma taearanai. ²⁸'Abi tohana aika ha'lobina Tirama maearima a'ikakaumai bero nibenakia, ia rauhubu ika'ainai aha'i.

²⁹Tirama hanona Iuda haukia mo ikupaiakia ekia Tirama, u? Ia rama haeai haukia ekia Tiramai a'i keao, u? Aha'i. Ia rama haeai haukia abokia mo ekia Tirama. ³⁰Weiana Tirama hanona hamona itare haukia a'ikakaumai bero kebenakia mai itare aha'i haukia abomo a'ikakauma ihobonai bero kebenakia. ³¹Ua homana raninai aika hanona a'ikakauma neianai rauhubu nahaba 'akaumana, u? Aha'i 'akina. Aika hanona rauhubu nahabakori 'inina.

A'ikakauma ai Aberahamo Bero Hauna.

4 ¹Uahomana raninai taba kaha'uhina 'aba'abaka Aberahamo 'eunai? A'ikakauma hoana hanona aea etabu ahi aihona?
²Aberahamo ena aka paukiai bero haunai peao raninai, taba weiakia paukiai peapa, ia Tirama wairanai aha'i. ³Puka robena taba na ehoma?

“Aberahamo hanona

Tirama ea'ikakaumana paunai
 Tirama ehore ia bero haunai
 ebaona.”

Gen 15.6

⁴Aka hauna mai 'arana weiana hanona beruberu tabana aha'i, ia ena hau haiara 'arana. ⁵Hau ha aka namona a'i nibabaina, ia Tirama nihore ki'a hauna bero nibaiben'i Tiramana nia'ikakaumana hauna hanona ena a'ikakauma paunai bero haunai kebaona. ⁶Maearima aka paunai bero a'i tea'ina ia Tirama herenai bero teal'ina haukia ekia namo 'abina neiana Davida ehinana.

⁷“Weiakia ekia aka ki'a obokia
 ehina hao mai ekia ki'a ea'i obo
 haukia hanona tenamo.

⁸Obiapaka kehore ekia ki'a

a'i ketuabi haukia hanona
tenamo."

Sal 32.1, 2

⁹Banamo neiana hanona tetarenakia haukia mo katea'ina 'ao a'i tetarenakia haukia abokiamo katea'ina? Aika aba ha'abi, "Aberahamo ena a'ikakauma paunai Tirama ehore berona ehinana." ¹⁰Rani tabanai bero haunai ebaona? Itare wairanai 'ao murinai? Tirama Aberahamo ena bero ehina 'uaina ba tetarena. ¹¹Aberahamo hanona a'i tetare bahana aonai ena a'ikakaumai bero ea'ina, muriai tetarena, weiana hanona a'ikakauma hoana ibatohana. Ua buonai Aberahamo hanona mai ekia a'ikakauma haukia weiakia Tirama bero haukiai ebaonakia haukia ikoikiai hamakia. ¹²Ba tetarenakia haukia abomo hamakia hanona Aberahamo. Ia tetarenakia haukia maikoikiai aha'i, baika hamaka Aberahamo a'i tetare bahana aonai ea'ikakauma, taearana weiana ihibonai kateka'a haukia hamakia.

Kaha'ikakauma Hanona Tirama Ena 'Abi'uai Kaha'ina.

¹³'Abi'uai hanona ebaibenai Aberahamo mai 'aba'abana kipokia hanopaka maikoinai katea'ina ia 'eukia, weiana hanona rauhubu paunai a'i ebena, ia bero weiana a'ikakaumai nimai hauna paunai ebena.

¹⁴Pokina rauhubu tia'i taeana haukia 'abi'uai patea'ina ia 'eukiai peao raninai a'ikakauma hanona ena namo aha'i, 'abi'uai abomo anina aha'i.

¹⁵Rauhubu nikabena hanona Tirama ena opuere nibaramana, ia rauhubu peaha'i raninai beho atetuakia abomo pateaha'i.

¹⁶Weiana buonai 'abi'uai hanona a'ikakaumai nimai baraibarai apa'uana ihibona, Aberahamo 'aba'abana ikoinai katea'ina, rauhubu tika'ai haraina haukia mo aha'i, ia Aberahamo ea'ikakauma ihibonai tia'ikakauma haukia ikoikiai herekiai. Pokina Aberahamo hanona aika ikoikai hamaka. ¹⁷Puka robenai na terere aihona, "Au oi hanopaka bo'ona hamakiai nabaoni'o." Ua buonai Aberahamo hanona aika hamaka Tirama wairanai. Aberahamo ehore Tirama weiana 'ari haukia ebamaurinakia abomo a'i terama tabakia ebaramanakia hauna ea'ikakaumana.

¹⁸Tirama Aberahamo miori kebena weiana raona ikoinai anikia aha'i 'ekanai Aberahamo hanona ea'ikakauma ena raona ikoinai, ua buonai ia hanona hanopaka bo'ona hamakiai eao, Puka robenai e'abi ihibona, "'Aba'abamu hanona bihiu 'abana ua kebo'o aiho." ¹⁹Aberahamo ihauna hanona hinabu hamomo buonai eonobaina matoha 'ari hauna 'abana mai Sara abomo miori kebaramana 'ekana aha'i, ia Aberahamo ena a'ikakauma hanona a'i eba'abe'abena. ²⁰Weiana Aberahamo Tirama ena 'abi'uuaiai aona a'i ebakai'au kai'auna ena a'ikakaumai ekori 'ini weianai etabura Tirama ebanamona. ²¹Haeamona e'iobi haraina Tirama hanona mai hiabuna ena 'abi'uai kebabaina. ²²Neiana buonai, "Tirama

Aberahamo ena a'ikakaumai eba tohana, bero haunai ebaona." ²³Ia ebatohana bero haunai ebaona 'abina tererena hanona Aberahamo ikupaiana paunai aha'i. ²⁴Ia aika abomo bero haukai kebaonaka pokina Iesu eka Obiapaka, 'ariai ebamikiri muena Tiramana naha'ikakaumana paunai. ²⁵Tirama Iesu ebaibenai aina e'ari aika eka ki'a paunai, haeamona ebamikiri muena emauri aika bero kebenaka paunai.

Beroka Ehinana Paunai Kahaonamo.

5 ¹Weiana eka a'ikakaumai bero ha'ina buonai Tirama kipokia baibuai kahamiaho Iesu Keriso eka Obiapaka paunai. ²Aika naha'ibina a'ikakauma taearana weianai hatoto ia paunai aoko'o hoana neiana aonai aba nahamiaho, raona apa'uana weiana Tirama ena nuabi aonai kahatoto hauna nahaonamo aina. ³Weiana mo aha'i, ia haiara ranikiae abomo nahaonamo, pokina naha 'ibina haiara nihore bakiro nibaramana, ⁴Bakiro nihore rabo harai nibaramana, abomo rabo harai nihore raona apa'uana nibaramana. ⁵Raona apa'uana neiana hanona abiabika a'i kea'i ki'ana, pokina Tirama ena raona'au Auba Robeai eheina aika aokai, Auba Robe weiana hanona Tirama ebaibenai aika 'euka.

⁶Aika kipoka bero kahatabuna a'i etaina aonai Tirama enuatae ranina tohanai Keriso e'ari aka ki'a hauka paukai. ⁷Hau ha bero hauna paunai ke'ari hanona kepahihi. Pa'e baika katenuatae re'a namo hauna paunai kate'ari. ⁸Ia ki'ai hamiaho oho aonai Keriso e'ari aika paukai, Tirama ena raona'au ua ebaiha aihonaka. ⁹Ua buonai Keriso e'ari aruarunai Tirama bero ebenaka. Aika naha'iohi haraina ia paunai Tirama ena opuere aonai kebamaurinaka. ¹⁰Aika hanona Tirama ena 'ou haukai haeao aonai Nahuna e'ari paunai kipokia habaibua, aba habaibua hauka naha'iohi haraina Keriso ena mauriai kebamaurinaka. ¹¹Weiana mo aha'i, aika abomo Tirama aonai nahaonamo eka Obiapaka Iesu Keriso paunai bariu aika Tirama kipokia aba habaibua.

Adamu 'Eunai 'Ari Emai Ia Keriso 'Eunai Mauri Emai.

¹²Hau hamona paunai ki'a hanopakai etoto, ki'a ehore 'ari etoto aina, ua buonai 'ari emai maearima ikoikiae herekia, taeara weianai ikoikiae teaka ki'a. ¹³Ki'a hanona aba erama 'uui hanopakai, ba rauhubu tebaibenai. Rauhubu aha'i paunai ki'a hanona ki'ai a'i tebaona. ¹⁴Ia 'ari hanona epoki Adamu ena raniai emai mo Mose ena raniai, maearima ikoinai Adamu ena aka ki'a ihobonai a'i tebabai ki'a haukia abomo te'ari.

Ua buonai Adamu hanona muriai kemai hauna ibabataina. ¹⁵Ia Tirama ena beruberu hanona Adamu ena ki'a 'abana aha'i. Pokina hau hamona ena ki'a paunai maearima bo'ona te'ari, ia Tirama ena aoko'o hoana hanona eapa'uua ki'a baha, Adamu ena ki'a etara haona weiana hanona ena aoko'o hoana beruberuna hau hamona Iesu Keriso paunai bo'ona katemauri. ¹⁶Haeamona Tirama ena beruberu apa'uana mai hau hamona ena babai

ki'a terarua hanona a'i teihobo, hau hamona ena babai ki'ai beho bakaina emai, ia beruberu apa'uana emai bero ebaramana. ¹⁷Hau hamona ena aka ki'a paunai 'ari ehore epoki ainakia, aika naha'obi haraina weiakia Tirama ena aoko'o hoana apa'uana eba'oruna hauna mai bero beruberuna katea'ina haukia mauri banaibana aonai katepoki hau hamona Iesu Keriso paunai.

¹⁸Weiana buonai hau hamona ena aka ki'ai maearima ikoikiai puma tea'ina, abomo hau hamona ena aka beroai bero emaiaina maearima ikoikiai mauri banaibana ebenakia. ¹⁹Hau hamona ena aia o'o aha'i paunai maearima bo'ona ki'a haukiai teao, abomo hau hamona ena aia o'oai maearima bo'ona bero haukiai kateao.

²⁰Rauhubu ekori hanona maearima ekia ki'a kateiha haraina ia ekia ki'a eapa'ua hao apa'ua hao. Ia ki'a eapa'ua 'ekanai Tirama ena aoko'o hoana hanona eapa'ua haonakia. ²¹Weiana buonai ki'a epoki 'ari taearanai abomo Tirama ena aoko'o hoana bero taearanai kepoki keaoainaka mauri banaibana 'ekana Iesu Keriso eka Obiapaka paunai.

Ki'a 'Eunai Kaha'ari Ia Keriso 'Eunai Kahamauri.

6 ¹Uahomana raninai aika 'abi tabana kaha'uhina? Tirama ena aoko'o hoana keapa'ua paunai ki'a kahababai to'o baihana, u? ²Ua a'i kehoma. Aika ki'a herenai aba ha'ari ki'a hiabunai hakaobo ba aehoma buonai ki'a aonai kahamiaho mue? ³Aika Keriso Iesu kipokia aba eba'uere robenaka hauka hanona ena 'ariai abomo kipokia aba eba'uere robe haeamonaka, weiana a'i to'iorina, u? ⁴Ua buonai 'uere robeai aika hanona ia kipokia ha'ari abomo ia kipokia tehorenaka, weiana Keriso Hamana nuabina hiabunai 'ariai ebamikiri muena. Ua buonai aika abomo mauri mahamahanai kahamiaho.

⁵Aika ia kipokia ha'ari haeamo raninai ia 'ariai emikiri mue ihobonai aika abomo 'ariai kahamikiri mue. ⁶Aba ha'iorina aika hauka 'ai'aina^b Keriso kipokia matiu ibiri ropo 'ubinai aba te'ari hanona hauka ena ki'a hiabuna aba weia ia'i obo, ba aika hanona ki'a ta'arana a'i kaha'i mue. ⁷Pokina e'ari hauna hanona ki'a hiabunai aba irubu.

⁸Bariu aika Keriso kipokia ha'ari raninai, naha'obi tohana aika hanona ia kipokia kahamiaho oioi. ⁹Pokina naha'iorina Keriso hanona 'ariai emikiri mue ba a'i ke'ari mue, 'ari hanona ia a'i kepoki ai muena. ¹⁰'Ari ia e'ari aina hauna hanona ki'a ikoikiai kebaorenakia paukiai rani hamonai e'ari, ia mauri nimauri aina hauna hanona Tirama nuabina paunai nimauri. ¹¹Taearea ihobonai wai abomimo kipomi kato'iobinimi, ki'a herenai aba to'ari, ia Tirama 'eunai aba tomauri Keriso Iesu aonai.

¹²Weiana buonai ki'a kehore hauanimi ke'ari hauna a'i kepoki aina ena nuatae akakia ki'a obokia a'i katoa'i taea. ¹³Abomo hauanimi papana

^b 6.6 'ao eka mauri 'ai'aina

ha ki'a aonai a'i katohorotina, ki'a akakia tabanai a'i keao, ia kipomi katobaibenai ainimi Tirama herenai ihobona weiakia 'ariai temauri mue haukia 'abana, hauanimi maikoina katobena, ia kehore bero akakia tabanai kebaonimi.¹⁴ Ki'a hanona wai emi pokia haunai a'i keao, pokina wai hanona rauhubu ba'anai a'i tomiaho, ia Tirama ena aoko'o hoana ba'anai tomiaho.

Bero Tohana Ta'arana Kaha'i.

¹⁵ Baaea kahahoma? Rauhubu ba'anai a'i nahamiaho ia Tirama ena aoko'o hoana ba'anai nahamiaho buonai ki'a kahababai, u? Aha'i 'akina.¹⁶ Wai aba to'ioquina weiana kipomi tubaibenai ainimi hau ha herenai aiana tuona raninai ena ta'ara ia'inai tuao 'abana. Ua buonai ki'a ena ta'ara ia'inai niao ainimi 'ari 'ekana 'ao Tirama aiana ionai niao ainimi bero 'ekana.¹⁷ Tirama kahabanamona. Pokina 'uainai wai hanona ki'a ena ta'ara ia'inai toao, ia bariu wai aomi maikoina teba'iobinimi 'abina weiana toa'i taeana.¹⁸ Wai ki'a herenai aba eirubunimi, bariu bero ena ta'ara ia'inai tuao.¹⁹ Maearima 'abi'abinai na'abi pokina aomi a'i niea paunai. 'Uainai hauanimi tobaibenai aina aka ki'a obokia mai ripuripu ta'arakia ia'inai toao ihobonai, bariu hanona hauanimi bero ena ta'ara ia'inai tomobaibenai, wai katorobe.

²⁰ Wai ki'a ena ta'ara ia'inai toao aonai wai hanona bero tohabo 'abaeana.²¹ Rani weiakiai aka ki'a obokia buabuakia hanona taba totabu ahina? Bariu tuhaumaeai tabakia mo. Taba weiakia puakiai hanona 'ari.²² Ia wai bariu hanona ki'ai aba irubu obo, ba Tirama ena ta'ara ia'ina haumiai tuao. Ua buonai buabuami hanona robe taearana tohanai, puanai hanona mauri banaibananai.²³ Pokina ki'a 'arana hanona 'ari, ia Tirama ena beruberu apa'uana hanona mauri banaibananai Keriso Iesu aika eka Obiapaka kipokia.^c

Keriso Rauhubu ai Erubunaka.

7 ¹ Uaho'aba'u e, au hanona wai rauhubu to'ioquina haumi nahina benimi, wai aba to'ioquina rauhubu hanona maearima nipoki aina maurina nemiaho aonai mo.² Rauhubu paunai babi'e ha atawana herenai kemiaho hau ena mauri beraurakia ikoikiai, ia hau ke'ari raninai ia hanona hawainibe rauhubuna herenai aba irubu ta'i.³ Weiana buonai hau nemiaho oho aonai babi'e kemikiri hau haeai ha keatawana raninai ia hanona nabau babi'ena kahahinana. Ia hau ke'ari raninai ia hanona rauhubu herenai aba irubu ta'i. Hau haeai ha keatawana re'a ia nabauna a'i kahahinana.

⁴ Weiana buonai uaho'aba'u e, wai abomo Keriso ena 'ari paunai rauhubu 'eunai to'ari, ba Keriso 'ariai emikiri hauna herena tuao,

^c 6.23 'ao aonai

buabuaka katerama Tirama 'eunai. ⁵ Aika hauani ena nuataeai hamiaho aonai, raona ki'a obokia terama rauhubu 'eunai teaka huanikai ba buabuakia habaramanakia puana hanona 'ari. ⁶ Ia aika ebiri 'ininaka tabana herenai aba ha'ari buonai bariu rauhubu herenai aba terubu ta'inaka, weiana buonai aika hanona taeara mahamahana Auba Robe 'eunai ta'ara kaha'i, ia rere rere 'ai'ainai aha'i.

Ki'a Ehore Eba'arinaka.

⁷ Ua buonai taba kaha'uhina? Rauhubu hanona eki'a? Aha'i 'akina. Rauhubu ehore au eba'ioquina'u ki'a hanona taba. Rauhubu a'i kehina bena'u, "Oi taba ha a'i konuataeai 'abaeaana." raninai, au a'i ka'ioquina nuatae 'abaea hanona taba. ⁸ Ia ki'a ehore taeara'u etabu rauhubu 'abinai weia nuatae 'abaea haeai haeai ao'uai ebaramanakia, ia rauhubu keaha'i raninai, ki'a hanona e'ari 'abana ena hiabu aha'i. ⁹ 'Uainai au hanona rauhubu a'i a'ioquina aonai aragonana namo'u ai amauri amiaho, iamo rauhubu 'abina a'ioquina aonai ki'a hanona aiha tinana emauri mauri, au hanona a'ari 'abana. ¹⁰ Rauhubu neiana hanona mauri ebaihanaka tabana, ia au 'eu'uai ia hanona 'ari tabanai eao. ¹¹ Pokina ki'a ehore taeara'u etabu rauhubuai e'oquina'u ba 'ari hau'u ai ebaona'u.

¹² Ia rauhubu kipona hanona erobe, rauhubu 'abina kipona abomo erobe, weiakia hanona tebero mai tenamo. ¹³ Uahomana raninai taba namona weiana hauna ehore au e'u 'ari tabanai eao, u? Aha'i 'akina. Rauhubu 'abina namonai ki'a ehore au here'uai 'ari ebaramana buonai, ki'a hanona i'obi haraiai keao, rauhubu 'abina paunai ki'a hanona ki'a tohanai eao.

Ki'a Eka Mauri Nipoki aina.

¹⁴ Ha'ioquina rauhubu hanona Tirama 'eunai emai, ia au hanona hauani 'eunai aeao, ki'a ehore ekawana'u ena ta'ara ia'inai naeao. ¹⁵ Au taba nababaina hauna obona a'i naobo, pokina nanuatae aina kababaina hauna a'i nababaina, ia taba 'arina a'i na'ari hauna nababaina. ¹⁶ Rauhubu ehore namo mai ki'a ebaihanaka. Ba taba a'i nanuatae aina hauna nababaina raninai, au nabatohana rauhubu hanona enamo. ¹⁷ Ua buonai nababaina hanona au kipo'u toha'u aha'i, ia ki'a ao'uai nemiaho hauna. ¹⁸ Au na'ioquina taba ha namona ao'u ai a'i nemiaho, weiana hauani'u ena nuataeai a'i nemiaho, pokina au taba namona nanuatae aina kababaina ia ibabainai hanona a'i nitaina. ¹⁹ Aka namona nanuatae aina kababaina hauna a'i nababaina, haeamona aka ki'a obokia ibabaikia a'i nanuataeai haukia nababai to'o baihana. ²⁰ Ia taba a'i nanuatae aina hauna nababaina raninai, nibabaina hauna hanona au toha'u aha'i, ia ki'a ao'uai nemiaho hauna niaka.

²¹ Weiiana au aka taearana ha atabu ahina, au e'u nuatae aka namona kababaina, ia aka ki'a obokia mo tiwaira tina. ²² Ao'u tohana Tirama

ena rauhubu niaonamo aina. ²³ Ia hauani'u ai rauhubu haeai niaka aihana, rauhubu weiana rauhubu ao'uai nemiaho hauna nehuarin, weiana hanona hauani'u ai niaka ki'a ena rauhubu ba'anai nebirina'u nibawapurana'u. ²⁴ Au ki'a'u, aoko'o'u! Tai kehore au hauani'u neiana niaoaina'u 'ari 'ekanai hauna herenai kebamaurina'u? ²⁵ Ia Tirama napaina Iesu Keriso eka Obiapaka eba maurina'u paunai. Ua buonai e'u mauri hanona nahomana, au ao'u tohana hanona Tirama ena rauhubu ta'arana ia'inai niao, ia hauani'u hanona ki'a ena rauhubu ta'arana ia'inai niao.

Keriso Eka Ki'a Ea'i Obo Ia Auba Robe Ebenaka.

8 ¹Weiana buonai bariu Keriso Iesu aonai temiaho haukia hanona puma ha a'i katehoaina. ²Pokina Keriso Iesu paunai Auba Robe rauhubuna mauri nimaiaina hauna ehore ki'a mai 'ari rauhubuna 'eukiai aba erubu obona'u. ³Hauani ena 'abe'abe paunai rauhubuai a'i ketaina 'ekanai Tirama ehore ebabaina. Ia ehore Nahuna hamomona eupuna, ki'a hauna 'abana ki'a 'aranai eao, maearima ekia puma ikoinai echoaina. ⁴Weiana hanona aika hauani ena aka ki'a obokia a'i nahababai, Auba Robe ena nuataeai nahamiaho hauka aokai rauhubu ena nuatae bero akana kebaore haraina.

⁵Hauani ena nuataeai temiaho haukia hanona hauani tabakia mo tiraonanakia, ia Auba Robe ena nuataeai temiaho haukia hanona Auba Robe ena aka tabakia tiraonanakia. ⁶Hauani ena raona ke'uai aina puana hanona 'ari, ia Auba Robe ena raona ke'uai aina puana hanona mauri banaibanoi mai baibua. ⁷Hauani ena raona ne'uai aina hanona Tirama ni'oatana, pokina weiana hanona Tirama ena rauhubu a'i nika'aina abomo kebabaina a'i ketaina. ⁸Weiakia hauani ena raonai temiaho haukia hanona Tirama ibaonamona hanona a'i ketaina.

⁹Ia wai Tirama ena Auba Robe aomiai nemiaho raninai, wai hanona hauanimi a'i nibaka'animi, ia Auba Robe nibaka'animi. Ia hau ha aonai Keriso ena Auba aha'i hauna hanona Keriso ena maearima aha'i. ¹⁰Aomiai Keriso nemiaho raninai hauanimi hanona abe'ari ki'a paunai, ia aubami hanona emauri bero paunai. ¹¹Ia Tirama Aubana weiana Iesu 'ariai ebamikirina hauna aomiai nemiaho raninai Keriso Iesu 'ariai ebamikirina Tiramana kehore wai hauanimi kate'ari haukia abomo kebaaurinakia ena Auba Robe aomiai nemiaho paunai.

Auba Robe Eaoainaka Tirama Nahunai Haeao.

¹²Weiana paunai uaho'aba'u e, aika hanona kahaka, ia hauani 'euna 'ara horeai aha'i, abomo hauani ena nuataeai a'i kahamauri. ¹³Pokina hauani ena nuatae 'ekakiai komiaho raninai oi hanona ko'ari Tirama wairanai, ia Auba Robe ena nuataeai hauani ena aka ki'a obokia koba 'arinakia raninai oi hanona komauri banaibanoi. ¹⁴Pokina weiakia

Tirama ena Auba Robe ne'uai ainakia haukia hanona Tirama nahuna. ¹⁵ Wai hanona ta'ara'i mai ta'u aubana a'i toa'ina ia Auba Robe toa'ina, weiana hanona niaoainimi Tirama nahunai^d tuao, Auba Robe weiana hiabunai Tirama nahaparina, "Hama'u,^e au Hama'u." ¹⁶ Auba Robe weiana aika aubaka ohi tibatohana aika hanona Tirama nahuna. ¹⁷ Bariu aika Ia nahuna raninai aika hanona barina kaha'ina hauka. Tirama barina kaha'ina hanona Keriso kipokia Ia nahunai kahaeao Tirama barina kaha'ina. Weiana Keriso kipokia ena haiara kahahaiara aina raninai ia nuabina abomo kaha'ina.

Wairai Kupa Aiaranai Nuabi Aonai Kahamiaho.

¹⁸ Au naraonana bariu rani neiana aika nahahau haiara aina hanona taba papakia, ia nuabi weiana muriae aika 'eukai kewaira tina hauna keapa'ua ki'a baha. ¹⁹ Tirama ebabai tabakia ikoikiai hanona tiba'l'mai ekia nuatae apa'uana Tirama nahuna katewaira tina. ²⁰ Pokina terama tabakia ikoikiai hanona taba anikia aha'i ba'anai temiaho, 'a ekia nuataeai aha'i, ia Tirama ena nuataeai. ²¹ Terama tabakia hanona hauani parina ena ibiri 'iniae kateirubu, Ba Tirama nahuna ekia nuabi irubuna aonai katemiaho haeamo.

²² Weiana aika ha'lobina terama tabakia maikoinai hanona mai ao pumakia matoha babi'e miori keba ramana haiarana 'abana emai mo bariu rani neiana. ²³ Iamo ikupaiakia aha'i, Tirama ena buabua kori'uaina Auba Robe ha'ina hauka abomo aoka niao puma mai nahabai'ima Tirama nahunai kebaonaka mai hauanika maikoina kebaurinakia. ²⁴ Aika nuatae apa'uana neianai mauri ha'ina. Ia nuatae apa'uana weiana aba haihana raninai a'i kahanuatae aina. Tai hanona taba aba ea'ina hauna nuatae apa'uana kebaona? ²⁵ Ia taba a'i nahe'i bahana hauna nahantuataeai apa'uana raninai, aika hanona mai bakiroka kahabai'ima.

²⁶ Taeara ihobonai Auba Robe hanona nibarainaka eka 'abe'abe aokiai, aika aea kahabahuba'ari aiho hanona a'i nahe'lobina, ia Auba Robe kipona nihore nibahuba'ari mai ao pumana maearima ke'abi a'i ketaina haunai ninoinoi aika paukai. ²⁷ Abomo maearima aokia neihanakia Tiramana hanona Auba Robe ena raona tabana e'lobina, pokina Auba Robe hanona Tirama ena maearima paukiai ninoinoi Tirama ena nuatae ihobonai.

²⁸ Aika nahe'lobina Tirama ebabainakia tabakia ikoikiai hanona tiaka haeamo Tirama tiraona'au aina haukia mai ena nuataeai eaparinakia haukia ibanamokiai. ²⁹ Pokina Tirama weiakia e'lobi 'uainakia haukia eba'orunakia Nahuna ihobonai kateao, ba Keriso hanona hau pakanai keao uaho'abana ikoikiai baiatakiai. ³⁰ Eba'orunakia haukia ia ehore

^d 8.15 'ao bakiro nahunai ^e 8.15 'ao "Papa"

eaparinakia, eaparinakia haukia ia ehore beroai ebaonakia, beroai ebaonakia haukia ia ehore ena nuabi ebenakia.

Taba Ha Tirama Ena Raona'au Herenai A'i Kea'iparenaka.

31 Uahomana raninai taba neiakia aea kaharoba ahuai aihonakia? Tirama aika nitainaka raninai tai hanona aika ke'oatanaka? Tai ha aha'i.
32 Ia nahuna hamomona a'i eubo aina, aika ikoikai paukai ebaibenai ai 'abaeana. Nahuna ebenaka buonai taba ikoikiai abomo kebeni 'abaeanaka.

33 Tai kehore Tirama ena a'itaea haukia atetua 'ekanai kehorotinakia? Tai ha aha'i. Tirama hanona ia niba tohanakia a'i tebeho. **34** Ba tai hanona puma kebenakia? Tai ha aha'i. Pokina Keriso Iesu e'ari, haeamona emikiri mue, ia hanona Tirama itipana tainai nemiaho, aika paukai ninoinoi. **35** Tai kehore Keriso ena raona'au ai kea'i parenaka? Atetua kehore 'ao bahaiara kehore 'ao bai'oata kehore 'ao arobo kehore 'ao uraru kehore 'ao ta'u kehore 'ao kareba kehore 'ao? Tai ha aha'i. **36** Atetua weiakia hanona Puka Robenai tererena ihobona etibaha,

“Ai hanona oi paumuai rani
 ikoikiai 'ari tawairana,
 ai hanona mamoe ai tibaonamai
 kateahu 'arinamai.”

Sal 44.22

37 Ia taba neiakia ikoikiai aokiai aika hanona hatarahi, niraona'au ainaka hauna paunai. **38** Pokina au aba a'iobi tohana, weiana 'ari 'ao mauri, anerukia 'ao hiabu aubakia,^f bariu temiaho tabakia 'ao wairai katemai tabakia, hiabu haeai haeai, **39** hano 'ubinai 'ao hano ba'anai, terama tabakia ikoinai ha kehore Tirama ena raona'au herenai a'i kea'i parenaka, pokina aika eka Obiapaka Iesu Keriso aonai nahamiaho paunai.

Tirama Isaraela Haukia Etina'anakia.

9 **1** Abi tohana nahinana Keriso aonai, au hanona a'i nabai'oi Auba Robe abomo ao'u e'lobina. **2** E'u ao ko'o hanona eapa'ua, ao aro'ari ao'uai hauna ena pua aha'i. **3** Au kipo'u nanuatae hanona peururu aina'u Keriso 'eunai pa'eho 'ekanai uaho'aba'u weiakia e'u itubu haukia patemauri paunai. **4** Ia hanona Isaraela haukia, Tirama nahunai teao mai ena nuabi ebawaira tinana herekiae, herekiae 'abi'uai robena ebabaina rauhubu ebenakia, marea robe tohanai tekuti mai 'abi'uai tea'ina. **5** Ia 'aba'abakia hanona maearima apa'uakia, ia ekia kupuai hanona Keriso hauaniai erama, ia hanona taba ikoikiae nipoki ainakia Tiramana, kahabanamona banaibani. Amen.

6 Au a'i natibaha Tirama ena 'abi'uai hanona e'eho, pokina Isaraela kupunai terama haukia re'a ikoikiae Isaraela haukia tohakia aha'i.

^f **8.38** auba ki'a obokia taburakia

⁷Aberahamo 'aba'abani mo ia ikoikiai hanona nahuna tohakia aha'i. Pokina Tirama Aberahamo ehina bena "Isako herenai katerama haukia mo 'aba'abamu ai kateao." ⁸Anina hanona miori hauanai terama haukia hanona Tirama nahuna aha'i. Ia Tirama ena 'abi'uaiai katerama miorikia hanona Aberahamo nahuna tohakiai kateao. ⁹'Abi'uai hanona na ehina aihona, "Ihau wairai rani nahomanai au kamue hanona Sara miori ha keba ramana."

¹⁰Weianai mo aha'i, ia Rebeka nahuna bai'apaea terama hamakia hamona Isako aika 'aba'abaka ena raniai abomo ihobo. ¹¹Ia miori a'i terama baha mai taba ha namona 'ao ki'a obona a'i tebabai bahana aonai, Tirama ena a'itaea hanona aba ena nuataeai ebabaina. ¹²Ekia babai paunai aha'i ia ena apariai ebabaina, Tirama Rebeka ehina bena etibaha, "Hau pakana kehore hau i'irina ta'arana kea'i." ¹³Puka robenai tererena ihobona etibaha, "Au Iakobo araona'au aina ia Esau 'arina a'i a'ari."

¹⁴Uahomana raninai taba kaha'uhina? Tirama hanona ena babai a'i tebero, u? Aha'i 'akina. ¹⁵Tirama ehore Mose ehina bena etibaha,

"Au pabarainakia haukia hanona
kabarainakia mai paoko'o ainakia
haukia hanona kaoko'o ainakia."

Eso 33.19

¹⁶Ua buonai Tirama maearima etina'ana hanona hau ha ena nuataeai 'ao aro'ariai aha'i, ia Tirama ena aoko'oi. ¹⁷Puka robenai Tirama Parao ehina bena etibaha, "Au oi obia aranai ahorotini'o ena pokи hanona neiana. E'u hiabu heremuai kabaiha baihaina, weianai hanopaka maikoinai au ata'u katehinana." ¹⁸Weiana buonai Tirama mo ena nuatae ihobonai keaoko'o ainakia haukia niaoko'o ainakia, aokia keba pahihinakia haukia aokia niba pahihinakia.

Tirama Ena Opure Mai Aoko'o.

¹⁹Uahomana raninai wai ha au kohina bena'u kotibaha, "Ua nihoma raninai, aehoma buonai Tirama eka beho nitabunakia? Tai kehore Tirama ena nuatae kekaiabuna?" ²⁰E'u hau e, oi hau aea homamu, Tirama ena 'abi nubamuena? Uro a'i kehore ebabaina hauna a'i kehina bena, "Taba buonai na obabai aihona'u?" ²¹Uro babai hauna hanona mai ena bero ia kehore tipu hamonai uro kebabainakia, ha hanona uro namona aka apa'uakiai keaka, ha hanona uro 'abaeana aka papakiai keaka.

²²Tirama hanona matoha uro babai hauna 'abana ena nuatae hanona ena opure mai ena hiabu kebaita baiha aina, iamo aona nia'l 'inina niopure ainakia haukia herekiai keaomo 'ari ranina eba'oruna hauna kemai. ²³Abomo enuatae ena nuabi apa'uana kebawaira tinana niaoko'o ainakia haukia herekiai hanona mai ena bero, weiakia aba eba'orunakia haukia hanona ena nuabi katea'ina. ²⁴Uro hanona aika eaparinaka hauka, Iuda haukia mo aha'i, 'a rama haeai haukia baiatakiai abomo. ²⁵Mahabanai hauna Hosea ena pukai ehinana ihobona etibaha,

“E'u maearima tohakia aha'i
 haukia kaparinakia
 ‘e'u maearima.’
 Itubu weiana a'i naraona'au aina
 hauna kaparina
 ‘e'u raona'au.’

Hos 2.23

²⁶ Ehina benakia,
 wai hanona au e'u maearima aha'i
 'ekanai haeamona keaparinakia
 ia hanona Mauri Tiramana
 nahuna.”

Hos 1.10

²⁷ Mahabanai hauna Isaia Isaraela haukia poukia ehinana etibaha,
 “Isaraela maearimakia patebo'o
 ki'a poe 'anona 'abana,
 ia harina bita 'akimo bamauri
 katea'ina.

²⁸ Obiapaka kehore noanoai bakai
 'abina hanopakai kehore hore
 haraina.”

Isa 10.22, 23

²⁹ Ihobonai mo Isaia ehina 'uaina 'abana,
 “Tabura Obiapakana 'aba'abamai
 baika a'i pehabonakia raninai
 ai hanona Sodoma mai Gomora
 ihobokiae pataeao.”

Isa 1.9

Rama Haeai Haukia Tea'ikakauma Ia Isaraela Haukia A'i Tea'ikakauma.

³⁰ Ua buonai taba na kahahoma? Rama haeai haukia bero a'i titabuna
 ia aba tea'ina, weiana hanona a'ikakaumai tea'ina. ³¹ Ia Isaraela haukia
 rauhubu taearanai bero tetabuna, ia a'i tetabu ahina. ³² Taba buonai
 a'i tea'ina? Pokina a'ikakaumai a'i tetabuna ia teraonana akai katetabu
 ahina. Ia haukia kaikai rea piharanai weia tekai. ³³ Puka Robenai
 tererena ihobona etibaha,

“Moihana Siona oeo aonai
 pihara ha ahorotina
 weianai maearima kebakai kai
 reanakia, haeamona wairo
 piharana weiana kehore
 keba'ehonakia.
 Ia tai nia'ikakauma hauna
 hanona a'i kehaumaea.”

Isa 8.14; 28.16

Isaraela Tirama Ena Aka A'i Teiha Tinana.

10 ¹Uaho'aba'u e, mai ao'u ikoinai e'u nuatae abomo e'u bahuba'ari niao Tirama herena, Isaraela haukia hanona patemauri. ²Au a'lobina ia hanona aokia tohanai Tirama tenuatae aina, ia 'abi tohana herenai ekia 'iobi aha'i. ³Ia a'i te'lobina bero hanona Tirama herenai nimai, ia kipokia mo ekia bero tebakori haukia tia'i 'ini. Weiana buonai Tirama ena bero a'i tea'i taeana. ⁴Ia Keriso hanona rauhubu ebaorena, ba katea'ikakauma haukia ikoikiai hanona bero katea'ina.

⁵Mose ehore rauhubu ai bero kea'ina robana eahuna etibaha, "Hau ha rauhubu taina ketai hanona ia aba kemauri." ⁶Ia bero a'ikakaumai nimai hauna na e'abi aiho, "Aomiai a'i kato'abi, Tai kekara'au keao kupa?" (Weia Keriso kebaririna.) ⁷'Ao, "Tai keriri keao 'uri aonai?" (Weia Keriso 'ari haukia baiatakiai kebakara'auna.) ⁸Taba e'uhina hauna hanona neiana, "Tirama ena 'abi hanona wai heremiai, pinamiai mai aomiai." Weiana hanona a'ikakauma 'abinai, ai tahore tairoro aina. ⁹Pou hanona nahomana, oi pinamuai kohina pouna 'Iesu hanona Obiapaka,' abomo Tirama hanona ia 'ariai ebamikirina hauna aomuai koa'ikakauma raninai oi hanona komauri. ¹⁰Pokina aomuai oa'ikakauma hanona aba obero Tirama wairanai, abomo pinamuai kohina pouna hanona komauri.

¹¹Weiana Puka Robenai e'abi etibaha, "Ia katea'ikakaumana haukia ikoikiai hanona a'i katehaumaea." ¹²Iuda mai rama haeai haukia baiatakiai ekia haeai hanona aha'i. Pokina Tirama hanona hamona ikoikiai ekia Obiapaka abomo atanai tekuti haukia ikoikiai hanona banamo nibenakia. ¹³Puka Robenai e'abi ihobonai,

"Obiapaka atanai tiapari
haukia ikoikiai hanona
katemauri."

Iol 2.32

¹⁴Ba weiakia herenai a'i tia'ikakauma haukia hanona aea kateapari aihona? Haeamona pouna a'i teona haukia hanona aea katea'ikakauma aihona? Abomo hau ha herekiai a'i keiroro raninai pou aea kateo'o aihona? ¹⁵Mai pou ihinana haukia a'i kateuhunakia raninai pou hanona aea kateiroro ai aihona? Puka Robenai tererena ihobonai, "Pou namona timaiaina haukia hanona aekia hama ua tenamo aiho!"

Isaraela Haukia Pou Namona A'i Tea'itaeana.

¹⁶Ia Isaraela haukia bo'ona hanona pou namona a'i tea'i taeana. Isaia e'abi ihobona, "Obiapaka e. Tai hanona emai pou tea'ikakaumana? Tai aha'i." ¹⁷Weiana buonai a'ikakauma hanona pou ionai nimai, mai aia o'o hanona Keriso ena 'abiai nimai.

¹⁸Ia au nabakai bakai, pou a'i teona, u? Aha'i. Pou hanona aba teona. Puka Robenai e'abi,

"Aiakia hanona aba ekarahi eao
hanopaka ikoikiai aokiai,

abomo ekia 'abi hanona hanopaka
puana abira abira etabu
ahinakia."

Sal 19.4

¹⁹Haeamona nabakai bakai, Isaraela haukia obo a'i teobo, u? Aha'i, obo teobo. Kori 'uaina Tirama ena 'abi Mose ehinana,

"Wai kabawamurunimi
hanopaka haeai maearimakia
atakia aha'i haukia herekia,
mai wai kabaopuerenimi hanopaka
weiakia ekia aotipa Tirama
herenai aha'i haukia herekiai."

Deu 32.21

²⁰Abomo Isaia aona ebataburana e'abi etibaha,

"Weiakia a'i tetabuna'u haukia
hanona tetabu ahina'u.
Abomo a'i tenoina'u haukia
herekiai kipo'u abawaira
tinana'u."

Isa 65.1

²¹Ia Isaraela 'abikia ehinana etibaha,

"Beraura hamona maikoina
ima'u atiu ahina weiakia
aia a'i tio'o mai tikamuri
haukia na'imanaakia katemue."

Isa 65.2

Tirama Isaraela Eaoko'o ainakia.

11 ¹Ua buonai au haeamona nabakai bakai, Tirama ena maearima ebaki'anakia, u? Aha'i 'akina. Au abomo Isaraela hau'u, Aberahamo 'aba'abana, Beniamina ena itubu hau'u. ²Tirama ena maearima etina'a 'uainakia haukia hanona a'i ebaki'anakia. Puka Robenai mahabanai hauna Elia robana eahuna 'abina wai aba to'lobina. Elia ehore Tirama wairanai Isaraela haukia ehinau ainakia etibaha, ³"Obiapaka e, ia emu mahabanai haukia aba teahu 'arinakia, mai emu itara robekia aba terubu 'iti 'itinakia, au mo ikupaia'u namiaho, abomo titabuna'u kateahu 'arina'u." ⁴'A Tirama Elia ena 'abi ebamuena taba na ehoma? Ia etibaha, "Au hanona kipo'u e'u maearima aba taha 'abaihau hamomo (7,000) bai'oi tiramana Baala a'i tekuti aina haukia abauhu ahinakia."

⁵Weiana bariu abomo taeara ihobonai maearima harina Tirama ena aoko'o hoanai ea'i taeananakia haukia temiaho. ⁶Tirama ena a'itaea hanona ena aoko'o hoana paunai, ia maearima ekia aka paukiai aha'i. Ekia aka paukiai ea'i taeananakia raninai Tirama ena aoko'o hoana hanona anina aha'i.^g

^g 11.6 'ao a'i keaka.

⁷Uahomana raninai taba na kahahoma? Isaraela haukia taba titabuna hauna hanona a'i tetabu ahina, ia Tirama ea'i taeanakia haukia tebabita mo weiana tetabu ahina. Ia harina bo'ona hanona aokia teba pahihina.

⁸Puka Robenai tererena ihibona etibaha,

“Tirama ehore aokia eba
paruanakia, mahakiai a'i
teihaiha mai haiakiai aia
a'i teona emaimo bariu.”

Deu 29.4; Isa 29.10

⁹Abomo Davida Tirama ehina bena etibaha,

“Ekia tatu 'itarana hanona rio
mai ba'ai kate'aeana
ba katebato'onakia kate'eho
puma kateal'ina.

¹⁰Mahakia kobaparua 'arinakia
a'i kateiha, mai kapekia
kobabeho baihanakia
rani ikoinai.”

Sal 69.22, 23

Tirama Ena Bamauri Rama Haeai Haukia Tea'ina.

¹¹Uahomana raninai haeamona nabakai bakai, ia hanona rioai tet'o te'eho aba tepua baihana, u? Aha'i 'akina. Ia ekia 'eho paunai rama haeai haukia bamauri aba tetabu ahina, ba Isaraela haukia ia katewamuru ainakia. ¹²Isaraela haukia ekia behoai hanopaka maearimakia banamo rarina tetabu ahina, abomo Tirama ena bamauri aonai teleho hanona rama haeai haukia banamo rarina tetabu ahina. 'A Isaraela haukia ikoikiai Tirama ena bamauri aonai katetoto raninai, banamo hanona keapa'ua ki'a baha.

¹³Au hanona wai rama haeai haumi nahina benimi. Au Tirama ena iuhubeau hau'u rama haeai haukia 'eukiai paunai, aka nababaina hauna kapaina. ¹⁴Weiana kababaina aonai e'u nuatae apa'uana e'u rama haukia kaba wamurunakia Keriso kate a'ikakaumana, ba Tirama kehore baika kebamaurinakia. ¹⁵Tirama Isaraela haukia ebakil'anakia paunai hanopaka maearimakia ehaunakia. Ba Tirama Isaraela haukia kea'i totonakia raninai taba kerama? Weiana hanona 'ari haukia katemauri.

¹⁶Parawa puapuana Tirama nahabena hauna erobe raninai parawa maikoina abomo erobe, ramu erobe raninai rena abomo terobe. ¹⁷Olibe ibato rena baika aba ikabe obo 'ekakia Olibe 'aki rena patea'ina Olibe ibato huana pate'apa to'ona, ramu hamonai hoho kateal'ina, ba oi hanona Olibe 'aki rena. ¹⁸Re weiakia tekabe obonakia haukia herekiai a'i koapa. Koapa re'a neiana koraonana, oi hanona ramu a'i nubaraina, ia ramu hanona oi nibaraini'o.

¹⁹Ua buonai oi hanona ko'abi, “Re weiakia tekabe hurinakia 'ekakiai au pa'e kate'apa to'ona'u.” ²⁰'Abi tohana, ekia a'ikakauma aha'i paunai

Tirama ebamohu hurinakia, ia oi hanona emu a'ikakauma buonai 'ekanai okoroti. Ua buonai a'i koapa, ia kota'u. ²¹Pokina Tirama re tohakia a'i eaoko'o ainakia raninai, oi abomumo a'i keaoko'o aini'o. ²²Weiana buonai Tirama ena namo mai ena pahihi koraonana, weiakia te'eho haukia hanona Tirama herekiae nipahihi, ia ena namo aonai komiaho hanona oi heremuai kenamo. Ua a'i kobabai aiho raninai, oi abomo ikabe huri. ²³Ia ekia kamuri kamuri patehabonakia raninai Tirama kehore ke'apa to'o muenakia, pokina ua kebabai aiho hanona ketaina. ²⁴Wai rama haeai haumi hanona matoha 'aki matiuna rena 'abana, ua buonai i'apa to'o matiu ibato hauna huanai hanona ke'ama'ama. Ba Tirama kehore Olibe ibato rekia ikabe huri haukia matiukia tohakiae ke'apa to'o muenakia hanona ke'ama'ama ki'a baha.

Tirama Ena Aoko'o Maearima Ikoikiae Ahakiae.

²⁵Uaho'aba'u e, au nanuatae wai 'abi bunina neiana kato'iorina, kipomi emi aotipa a'i katoapaina. 'Abi bunina weiana hanona Isaraela haukia bariu baika aokia tibapahihi keaomo Tirama etina'anakia rama haeai haukia ikoinai katekatoto 'uai. ²⁶Ba Isaraela haukia ikoikiae katemauri. Puka Robenai ererena ihobonai etibaha,

“Siona ai bamauri hauna
ha kemai.

Ia kehore Iakobo 'aba'abana
herekiae Tirama ia'l i ki'ana
tabakia kebairu parenakia.

²⁷Rani weianai ekia ki'a
ka'i parenakia Au e'u 'abi'uai
ihobonai.”

Isa 59.20, 21; 279

²⁸Iuda haukia pou namona tibaki'ana ihobona Tirama ena 'ou haukiae tiao hanona wai rama haeai haumi emi namo tabanai eao, ia 'aba'abakia ea'i taeanakia paunai ia Tirama ena raona'au aonai temiaho. ²⁹Pokina Tirama ena apari mai ena beruberu hanona a'i kebahaeaina.

³⁰'Uainai wai rama haeai haumi Tirama ena 'abi a'i toa'i taeanakia, ia bariu hanona wai Tirama ena aoko'o aba toa'ina, pokina Iuda haukia Tirama ena 'abi a'i tea'i taeana paunai. ³¹Taeara ihobonai bariu Iuda haukia hanona Tirama ena 'abi a'i tia'l taeana, 'a aoko'o weiana toa'ina ihobonai ia abokiamo Tirama ena aoko'o weiana kateal'ina. ³²Tirama ehore maearima ikoikiae 'abi a'i tia'l taeanakia 'ekanai ekaibunakia, pokina weianai ena aoko'o kebahiranakia.

Tirama Atana Kahabanamona.

³³Tirama hanona eaobero
mai eaotipa ki'a baha
ihobona 'aku 'ourana 'abana.

Ena raona harai 'abina hanona
 tai kehore kehina haraina?
 Ena hoahoa taearana hanona
 tai kehore ke'iobi haraina?
 Tai aha'i.

³⁴Puka robenai e'abi,
 "Tai hanona Obiapaka
 aona e'iorina? 'ao,
 Tai hanona ia ena bairobe
 haunai eao?

Isa 40.13

³⁵Tai kehore taba ha
 Tirama kebeni 'uaina
 ba Tirama taba weiana 'arana
 kehorenai?"

Job 41.11

³⁶Taba ikoikiai ibaramakia hanona
 Tirama, taba ikoikiai Ia paunai
 tekarahi, abomo taba ikoikiai
 Ia 'eunai kateao.
 Nuabi hanona Tirama herenai
 keaomo banaibanai. Amen.

Eka Kuti Hoana Tohana.

12 ¹Ua buonai uaho'aba'u e, Tirama ena aoko'o rarina 'akina paunai
 nanoinimi, hauanimi mai aomi maikoina Tirama katobena, baiben
 tabakia mauri maurikiai kateao, katerobe Tirama aona katebanamona.
 Emi kuti hoana tohana^h hanona weiana. ²Hanopaka neiana ena hoahoa
 a'i katohobo hobo aina, 'a aomi katobamaha mahanakia emi mauri
 katobahaeaina, weianai Tirama ena nuatae hanona taba, ia niaonamo aina
 hanona taba mai namona tohana hanona taba kato'iobi haraina.

Tirama Ena Ibeni Ebeni'o Hauna Akana Kobabaina.

³Barai barai apa'uana ebena'u paunai, au wai ikoimiai nahina benimi.
 Kipomi a'i katoraona apa'uanimi, ia kipomi katoraona raona, aomi
 katebero, Tirama ehore ha ha emi a'ikakauma aea homakia ebenimi
 ihobokiai. ⁴Aika hauanika hanona hamona ia puana hanona ebo'o, ia
 ekia aka hanona haeai haeai. ⁵Taeara ihobonai aika hanona habo'o, ia
 Keriso aonai hanona hauani hamona, puakia haeai haeai nahabahamomo.

⁶Tirama ena aoko'o hoanai beruberu tabakia haeai haeai aba ebenaka,
 hau ha ena beruberu hanona mahabanai re'a ia kemahabanai ena
 a'ikakauma ihobonai. ⁷Hau ha ena beruberu ta'ara a'i re'a ta'ara kea'i,

^h 12.1 'ao Aubami kuti hoana

hau ha ena beruberu ba'iobi re'a keba'iobi. ⁸ Batabura hauna kebatabura, baiben'i hauna kebaiben'i mai aona ikoinai, 'uai hauna ke'uai mai bakirona, aoko'o hauna keaoko'o mai aonamona.

Aoka Tohanai Uaho'abaka Kaharaona'au aina.

⁹ Emi raona'au hanona katobatohana. Ki'a tabakia 'arikia a'i kato'ari, namo tabakia kato babainakia. ¹⁰ Ha ha katoraona'au ainimi uaho'abami 'abana, abomo ha ha katomariki ainimi. ¹¹ Katoaka tabura a'i kato'aboro. Auba hiabunai Obiapaka ena ta'ara katoa'ina mai aomi ikoinai. ¹² Nuatae apa'uana aonai katoaonamo. Aro'ari ranikiai katotabura. Rani ikoikiai katobahuba'ari.

¹³ Tirama ena maearima teuraru haukia katobarainakia. Baki haukia katoa'i taeananakia emi ituai.

¹⁴ Ti'oatanimi haukia Tirama katonoina kebanamonakia, a'i katoururu ainakia, ia katoba namonakia. ¹⁵ Tiaonamo haukia kipokia katoaonamo, weiakia tihaihai haukia kipokia katohai. ¹⁶ Ikoimiai emi miahoai aomi katehamomo. A'i katoapa, 'aiaunu haukia kipokia katomiaho haeamo. Kipomi emi aotipa a'i katoapainakia.

¹⁷ Hau ha ena aka ki'a heremai hauna 'arana ki'ai a'i katobamuena, ia maearima ikoikiai wairakiai aka namokia katobabainakia.

¹⁸ Ketainimi taearanai, maearima ikoikiai kipokia baibuai katomiaho. ¹⁹ E'u hau e, ki'a 'arana kipomi a'i katobamuena, katohabona Tirama ena opuere kebabaina. Pokina Puka robenai aba tererena, "Obiapaka e'abi, 'Ara hore hanona au ima'u ai, au kahore 'arana kabamuena."

²⁰ Haeamona tererena,

"Emu 'ou hauna mare'a ni'ari
raninai aniani kobena,
abomo 'akona ni'ororo
raninai bei kobena.
Babai neiana kobabaina
hanona ia kobahaumaeana
ihobona matoha 'aranai iruba
nuhore 'auna."

Her 25.21, 22

²¹ Aka ki'a kehore wai a'i kehaoti boanimi, ia emi aka namokiai aka ki'a katohaoti boana.

Aika Kabamani Ena Hiabu Ba'anai Kahamiaho.

13 ¹ Maearima ikoikiai hanona tipoki ainakia haukia aiakia katea'i taeananakia. Pokina poki hanona kipona a'i erama ia Tirama herenai emai, poki haukia ikoikiai hanona Tirama ehore ebakorinakia. ² Weiana hau ha poki hauna ni'oatana hanona ihobona mo Tirama ebakorina hauna ni'oatana, bai'oata akana nibabaina hauna hanona

kipona ena puma ketabu ahina. ³Pokina aka namona tibabaina haukia hanona poki haukia a'i titau ainakia, ia beho babai haukia mo. Oi nonuatae poki hauna a'i kota'u aina? Ua homana re'a aka namokia kobabai, ba ia kehore oi kebanamoni'o. ⁴Ia hanona Tirama ena ta'ara a'i hauna emu namo akana nibabaina. 'A pobabai ki'a hanona ia pota'u aina. Pokina ia hanona tare a'i ea'i 'abaeana. Ia hanona Tirama ena ta'ara a'i hauna babai ki'a haukia 'arakia kebenakia. ⁵Ua buonai poki haukia aiakia kahaona, puma herenai kahakapare paunai mo aha'i, ia raona bero paunai abomo.

⁶Ua buonai wai abomo takiti monina tubaiben, pokina ia hanona Tirama ena ta'ara a'i haukia, rani ikoinai barai barai akana neiana tibabaina. ⁷Taba katobaiben Kabamani herekiae haukia kato benakia. Moni bararo haeai haeai haukia katobaiben, titau aina hauna katota'u aina, timariki aina hauna katomariki aina.

'Abami 'Arikia Kato'ari Toha.

⁸Hau ha herenai taba ha a'i koa'i 'abae 'uaina, ia taba kahababai to'o baihana hauna hanona ha ha kaharaona'au ainaka. Herena hauna niraona'au aina hauna hanona rauhubu aba nikai haraina. ⁹Rauhubu neiakia, 'Al'i konabau ki'a, a'i koahuahu, a'i kobainao, abomo hau ha ena taba a'i kouataeai 'abaeana' mai rauhubu baika kipokia teba hamomonakia hanona 'abina apa'uana hamona neiana, 'Heremu hauna koraona'au aina ihobona kipomu nuraona'au aini'o 'abana.' ¹⁰Hau ha mai ena raona'au hauna nihore herena hauna a'i nia'i ki'ana. Ua buonai katoraona'au hanona rauhubu maikoinai aba tubatohana.

Ea Taearanai Kahaka'a.

¹¹Rani neiana tabana hanona to'lobina paruai katono'a raona'au akana katobabaina ranina aba ekara'au. Pokina popounai ha'ikakauma raninai ibamaurika beraurana hanona atau'ai 'a bariu hanona aba herekai. ¹²Rabi aba niore mararani Iesu ena mai ranina hanona aba herekai. Ua buonai wapura akakia hamahabonakia, ia ea ena huari hoakia hama'inakia. ¹³Eka hoahoa patenamo ihobona mararani nahababai 'abana. Al'i kaharipu ripu, a'i kahainu 'ari, a'i kahanabau, a'i kaharea, a'i kaha'au, a'i kahawamuru. ¹⁴Obiapaka Iesu Keriso hanona emi huari habuninai katobaona, ia hauanimi ekia nuatae akakia ki'a obokia a'i katoa'i taeankakia.

Uaho'abami Puma A'i Katobena.

14 ¹Hau ha ena a'ikakauma e'abe'abe hauna katoa'i taeana, ia ena raonaraona weiana hauna a'i kato'abi baitaeai aina. ²Hau ha mai ena a'ikakauma taba ikoikiae niani, ia ha ena a'ikakauma e'abe'abe hauna

uma tabakia mo niani. ³Taba ikoikiai niani hauna a'i niani hauna herenai a'i kea'i ki'ana abomo uma anianikia mo niani hauna taba ikoikiai niani hauna a'i ke'uhina, pokina Tirama ehole ia terarua aba ea'i taeanakia. ⁴Oi hanona tai, hau ha ena ta'ara a'i hauna no'uhina? Ia kekorì 'ini 'ao ke'eho re'a weiana hanona poki hauna ena hiabu. Ia hanona kekorì 'ini pokina Obiapaka hanona mai hiabuna kebakori 'inina.

⁵Hau ha niraonana beraura ha hanona etara ahi ba beraura baika, mai hau ha niraonana beraura ikoikiai hanona ihobo. Ha ha kipokia ekia raona raona katebakori harainakia. ⁶Hau neiana niraonana beraura ha eapa'ua Obiapaka paunai, hau weiana taba ikoikiai niani Obiapaka paunai, pokina kateaniani raninai Tirama tibnamo 'uaina. Mai hau ha Obiapaka paunai aniani baika nibaki'anakia, ia abomo Tirama nibanamona.

⁷Pokina aika baiatakai hau ha a'i nimauri ia kipona paunai, abomo hau ha a'i ni'ari ia kipona paunai. ⁸Nahamauri hanona Obiapaka paunai nahamauri abomo kaha'ari hanona Obiapaka paunai kaha'ari. Ua buonai kahamauri 'ao kaha'ari re'a aika hanona Obiapaka 'euna. ⁹Neiana buonai Keriso e'ari abomo emauri mue, 'ari mai mauri haukia ekia Obiapakai keao.

¹⁰'A oi aehoma buonai uaho'abamu behoai nuhorotina? Aehoma buonai nua'lì ki'ana? Aika ikoikai hanona Tirama wairanai ena bakai 'ekanai kahakoroti. ¹¹Puka robenai tererena ihobona,

“Obiapaka ni'abi;
Au namauri toha buonai,
maearima ikoikiai au waira'u ai
katekaipehu, abomo maearima
ikoikiai pinakiai katehina
pouna'u Au hanona Tirama.”

Isa 45.23

¹²Ua buonai aika ikoikai ha ha Tirama wairanai kipoka pouka kahahina.

Uaho'abami A'i Katoba'ehona.

¹³Ua buonai aika ha ha kipoka behoai a'i kahahorotinaka. Abomo uaho'abaka ia'i ki'ana 'ao iba'ehona ki'a aonai raonana a'i kaharaonana.

¹⁴Au Obiapaka Iesu aonai a'lobina abomo nabatohana aniani tabakia ha kipona a'i eki'a Tirama wairanai, 'a hau ha niraonana aniani tabana ha eki'a raninai aniani weiana hanona eki'a ia kipona herenai. ¹⁵Ia emu aniani tabana buonai uaho'abamu aona nubahiarana raninai, oi hanona raona'au taearanai a'i nuka'a. Uaho'abamu weiana paunai Keriso e'ari hauna emu aniani koana hauna buonai a'i moa'i ki'ana. ¹⁶Ua buonai nuraonana hoahoa oi heremuai enamo hauna ko'ima haraina ki'a obona a'i temehinana. ¹⁷Pokina Tirama ena obia aiarana hanona aniani mai inuinu tabana aha'i, ia bero, baibua mai aonamo, weiakia hanona Auba

Robe nimaiainkia. ¹⁸ Hau ha taeara neiakiai Keriso ta'arana nia'i hauna hanona Tirama ia niaonamo aina maearima abomo ena namo tibatohana.

¹⁹ Ua buonai rani ikoinai mai taburaka baibua taearakia kahatabu, abomo ha ha kahaba taburanaka. ²⁰ Aniani paunai Tirama ena aka a'i koal'i ki'ana. Aniani ikoikiai hanona tenamo, iamo oi aniani tabana ha nuana paunai 'abamu ki'a aonai ketoto raninai ki'a hanona oi heremuai. ²¹ Uaho'abamu aona ibaro'arina akana a'i kobabaina hanona enamo, mahi weiakia a'i koani a'i koinu 'ari. ²² Ua buonai raona neiakia emu a'ikakaumai ko'ima harainakia Tirama mai oi torarua baiatamiai. Hau ha taba ha kipona niraonana ebero hauna nibabaina aonai, aka weiana paunai aona a'i kearo'ari hauna hanona enamo. ²³ 'A aona mai kai'au kai'una nianiani hauna hanona Tirama ia puma nibena, pokina aniani weiana aonai ia a'i nia'ikakauma paunai. A'ikakaumai a'i tibabainakia tabakia ikoikiai hanona teki'a.

Kipoka A'i Kahabaonamonaka 'Abaka Kahabarainakia.

15 ¹Aika a'ikakaumai hatabura hauka hanona a'ikakaumai te'abe'abe haukia ekia puma kahabuana. Aika kipoka eka aonamo mo a'i kahatabu. ²Ha ha hereka haukia kahaba aonamonakia kipokia ekia namo paunai, weiana kehore ekia a'ikakauma kebataburana. ³Pokina Keriso abomo kipona ena aonamo mo a'i etabuna. Puka Robenai tererena ihobona etibaha,

“Bapo'o po'o 'abikia oi
tebapo'o aini'o haukia
au abomo tebapo'o aina'u.”

Sal 69.9

⁴"Uainai terere tabakia hanona aika ibamarereka paunai tererenakia, weiana Puka robena kahatuabina hanona aika bakiro mai tabura kebenaka keaomo nuatae apa'uana kahatabu ahina. ⁵Au nabahuba'ari bakiro mai batabura nibaibenitiramana kehore Keriso Iesu murinai katoka'a raninai aomi keba hamomonakia. ⁶Ba ikoimiai mai aomi hamona abomo aia hamonai Tirama aika Obiapaka Iesu Keriso Hamana katobanamona.

Pouna Namona Rama Haeai Haukia Herekiai Abomo Teihobo.

⁷Ua buonai 'abami katoa'i taeanakia ihobona Keriso ea'i taeanimi 'abana, babai weianai Tirama kahabanamona. ⁸Au wai nahina benimi, Keriso hanona Tirama ena 'abi tohana paunai Iuda haukia¹ ekia ta'ara ia'ina haunai eao, Tirama ena 'abi 'uai 'aba'abakia herekiai haukia ibatohakia paunai, ⁹abomo rama haeai haukia Tirama katebanamona ena aoko'o paunai. Puka robenai tererena Davida e'abi ihobona,

“Ua buonai rama haeai haukia

¹ 15.8 'ao itare tea'ina haukia

baiatakiai kabanamoni'o,
abomo Oi atamu kahui aina."

Sal 18.49

¹⁰Haeamona Mose e'abi etibaha,
“Rama haeai haumi e,
Tirama ena maearima kipokia
katoaonamo haeamo.”

Deu 32.43

¹¹Haeamona Davida e'abi etibaha,
“Rama haeai haumi ikoimiai,
Obiapaka katobanamona.
Abomo maearima ikoimiai,
ia katohui aina.”

Sal 117.1

¹²Haeamona Isaia e'abi,
“Iese ena rama nininai
hau ha kewaira tina,
rama haeai haukia kepoki ainakia.
Rama haeai haukia katehore
ia ikupaina katenuataeai
apa'uana.”

Isa 11.10

¹³Au nabahuba'ari, nuatae apa'uana nibaibenii Tiramana kehore emi
a'ikakaumai aonamo mai baibua ikoinai kebabonunimi. Weiana Auba
Robe hiabunai emi nuatae keba apa'uana rani ikoinai.

Paulo Rama Haeai Haukia Ekia Aka Haunai Eao.

¹⁴Uaho'aba'u e, au a'iobi haraina wai hanona emi hoa namokia tebo'o,
mai ikoimiai hanona a'ikakauma taearana to'iobi haraina buonai, kipomi
ha ha katoba'ibinimi hanona ketaina. ¹⁵Ia marere neiana aonai taba
baika mai tabura'u arere benimi hanona wai ibaraonami, neiana hanona
Tirama ena aoko'o hoana ebena'u paunai. ¹⁶Au hanona Keriso Iesu ena
ta'ara a'i hau'u ai aeao rama haeai haukia 'eukiai, kaka matoha robe
hau'u Tirama ena pou namona kairoro aina, weiana Auba Robe ena
barobe hiabunai rama haeai haukia hanona baibeni tabakiai kateao
Tirama kea'i taeanakia.

¹⁷Ua buonai Tirama ena aka nababaina hanona napa Keriso Iesu aonai.
¹⁸Au 'abi haeai haeai a'i kahinanakia, ia 'abi hamonamo kahinana,
Keriso au ebaraina'u kairoro mai kaka rama haeai haukia herekiai
kamaiaianakia Tirama herena aiana kateka'aina hauna mo, ¹⁹au e'u aka
weiana aonai Auba robe hiabunai hoa mai babai hiabukia tewaira tina.
Weiana Ierusalemai akakaiaro aeao mo Iluriko 'eka maikoina Keriso
pouna namona airoroai orena. ²⁰Rani ikoinai e'u raona apa'uana hanona
neiana, pou namona kairoro aina Keriso atana a'i te'ibina 'ekakiai.
Weiana hanona hau ha ena hoboro ebakorina hauna ahanai e'u itu a'i
mabakorina paunai. ²¹Puka robenai tererena ihobona etibaha,

“Pouna a'i teona haukia
hanona kateihana, abomo aiana
a'i teona haukia hanona
kate'lobina.”

Isa 52.15

Paulo Eraonana Keao Roma.

²²Aka weiana ehore rani bo'okia eba'orona'u buonai, a'i awahi heremi. ²³'A bariu 'eka neianai e'u aka aba abaorenakia, abomo ihau bo'ona anuatae kawahi kaihanimi. ²⁴Ua buonai au nanuatae kakabanai Speini kaeao raninai kaihanimi, mai aonamo'u wai kipokia kahamiaho rani papana, murinai katobaraina'u kaeao weia.

²⁵Ia au bariu Ierusalema naeo Tirama ena maearima weia temiaho haukia ibaraikia paunai. ²⁶Pokina Tirama ena marea maearimakia weiakia Makedonia mai Akaia hanokia haukia kipokia ekia nuataeai beruberu tabakia tebararo Tirama ena robe maearimakia Ierusalemai teuraru haukia 'eukia. ²⁷Ia aka weiana tebabaina mai aonamokia. Ia ua tebabai aiho hanona ebero. Pokina Iuda haukia aubakia ena banamo rama haeai haukia kipokia tewatena buonai rama haeai haukia hauani ena banamo tabakia baika Iuda haukia Keriso tia'ikakaumana haukia katebenakia hanona ebero.

²⁸Aka neiana kabaoren, moni tebararona hauna kipo'u kaeaoaina Ierusalema haukia kabenakia murinai, kawahi kaihanimi ba Speini kaeao. ²⁹Au na'lobina, kawahi heremi raninai Keriso ena banamo maikoinai kawahi aina.

³⁰Uaho'aba'u e, eka Obiapaka Iesu Keriso paunai abomo raona'au weiana Auba robe ebenaka hauna paunai nanoinimi, emi bahuba'ari ai kipokia kahabahamomo Tirama katonoina au pau'u ai. ³¹Emi bahuba'ari ai Tirama katonoina Iudea aonai Iesu Keriso a'i tia'ikakaumana haukia imakiai kebamaurina'u, abomo Tirama ena maearima weia Ierusalemai temiaho haukia e'u aka neiana katea'i taeana mai aonamokia. ³²Uahomana raninai Tirama ena nuataeai kawahi heremi mai aonamo'u, abomo kipokia kahabatabura haeamonaka.

³³Baibua nibaibenit Tiramana ikoimiai heremiai kemiaho. Amen.

Paulo Ena Banamo 'Abikia.

16 ¹Au wai naba'lobinimi haibuka Foibe niwahi, ia hanona Kenkrea aiara apa'uana Tirama ena marea ena aka^j babi'ena ha. ²Nanoinimi Obiapaka atanai katoa'i taeana, ihobona Tirama ena robe maearimakia tua'i taeanakia 'abana, abomo ena nuatae akanai hanona

^j 16.1 *Diakono*

katobaraina, pokina ia ehore maearima bo'ona ebarainakia, au abomo ebaraina'u.

³ E'u banamo Priskila mai Akula katobenakia, ia hanona au kipokia Keriso Iesu ena aka tababaina haukia. ⁴ Terarua au pau'uai ekia mauri a'i teraonana. Banamo 'abina nabenakia, aumo ikupaia'u ahal'i, ia rama haeai haukia ekia Tirama ena marea haukia ikoikiai abomo banamo 'abina tebaibeni.

⁵ E'u banamo terarua ekia ituai tito'u haukia weiakia Tirama ena marea haukia abomo katobenakia.

E'u banamo e'u raona'au hauna Epaineto katobena, ia hanona Asia aonai hau kori'uaina ena mauri ebaibeni Keriso 'euna.

⁶ E'u banamo Maria katobena, ia hanona wai paumiai aka apa'uana ebabaina.

⁷ E'u banamo hatia'a'u Androniko mai Iunia katobenakia, ia terarua mai au kipokia wapura itunai tamiaho. Iuhubeau haukia ia terarua te'iobi harainakia, ia hanona Keriso tea'ikakauma 'uaina ba au hanona muriai.

⁸ E'u banamo Ampilia katobena, Obiapaka aonai naraona'au aina.

⁹ Abomo e'u banamo Urebano katobena, takhaeamo Keriso aonai, e'u raona'au hauna Staku abomo e'u banamo katobena.

¹⁰ Abomo e'u banamo Apele katobena, ia hana atetua terama ranikiae ena a'ikakaumai ekori 'ini Keriso aonai.

E'u banamo Aristobulo ena itu haukia katobenakia.

¹¹ E'u banamo hatia'a'u Herodiona katobena, e'u banamo Nakiso ena itu haukia katobenakia, ia hanona Obiapaka aonai haukia.

¹² E'u banamo Trupena mai Truposa katobenakia, ia hanona Obiapaka paunai aka tebabai harai babi'ekia.

E'u banamo e'u raona'au babi'ena Peresi katobena, ia hanona Obiapaka aonai aka rarina 'akina ebabaina.

¹³ E'u banamo Obiapaka etina'ana hauna Rufo mai hinana ohi katobenakia, ia hinana hanona au hina'u ai eao.

¹⁴ E'u banamo Asunukrito, Pilegon, Hereme, Patroba, Herema mai kipokia temiaho haeamo haukia katobenakia.

¹⁵ E'u banamo Pilologo, Iulia, Nerea haibuna ohi abomo Olumupa mai Tirama ena robe maearimakia ikoikiae ia kipokia temiaho haeamo haukia katobenakia.

¹⁶ Ha ha baipau robenai kipomi katobanamonimi.

Keriso ena marea maearimakia ikoikiae ekia banamo tetiu ahina heremi.

Baraona 'Ini 'Abina Orena Ebenakia.

¹⁷Uaho'aba'u e, nabahi ahinimi, hoa hore abomo emi a'ikakauma tia'i ki'ana haukia mai 'iobi weiana toa'ina hauna ti'oatana haukia katoiha 'ininakia, abomo herekiae katokapare. ¹⁸Pokina maearima uahomakia haukia hanona Keriso aika eka Obiapaka ena aka a'i tibabaina, 'a kipokia ekia nuatae akakia tibabai, ekia 'abi namokiae abomo bahao rea 'abi'abikiae maearima weiakia ki'a herenai ekia 'iobi aha'i haukia tibahao reanakia. ¹⁹Wai pou namona aiana tuka'aina hanona maearima ikoikiae pouna aba teona, weiana buonai au hanona wai naonamo ainimi. Au nanuatae wai hanona taba namokiae herekiae katoaotipa, ia taba ki'a obokia ibabaikiae a'i katoraonana. ²⁰Baibua Tiramana kehore rani a'i kehoma'a Satani aba kehe amataina wai 'apumi ba'akiae. Au nabahuba'ari, aika eka Obiapaka Iesu ena aoko'o hoana heremiae kemiaho.

A'ikakauma Haukia Baika Ekia Banamo 'Abikiae.

- ²¹ Timoteo, au tararua tako haeamo hauna mai hatia'a'u Luka, Iason, Sosipatro ekia banamo tetiu ahina heremiae ai.
- ²² Au, Teretio, Paulo ehina 'abikiae marere neianai arerenakia hau'u abo'umo Obiapaka atanai nabanamonimi.
- ²³ Gaio ia herenai namiaho, neia ena ituai Tiramana ena marea maearimamai tato'u haumai nibarainamai mai aonamomai tamiaho, ena banamo netiu ahina heremiae, aiara apa'uana monina ne'imana hauna Erasto mai uaho'abaka Koato terarua ekia banamo abomo tetiu ahinakia heremiae.
- ²⁴ Au nabahuba'ari, eka Obiapaka Iesu Keriso ena aoko'o hoana hanona ikoimiae heremiae kemiaho. Amen.

Tirama Kahabanamona.

²⁵ Tirama kahabanamona, ia hanona mai taburana kebakori 'ininimi emi a'ikakaumai, Iesu Keriso pouna namona nairoro aina hauna taearanai, mai 'abi tohana bunina 'uainai rani homa'ana tebunina hauna ebawaira tinana taearanai. ²⁶'A bariu 'abi tohana weiana hanona miaho banai banai Tiramana ena 'abiai mahabanai haukia ekia rere rere aonai ewaira tina, maearima ikoikiae 'abi tohana weiana teba'iobinakia, ua buonai hanopaka ikoikiae Tirama kate a'ikakaumana abomo aiana kateka'aina. ²⁷Aobero Tiramana hamo hamona kahabanamona Iesu Keriso paunai Ia nuabina kemiaho banai banai! Amen.